

Homenahe na sr. Lio Booï na Cas di Cultura diasabra awor



Sr. Lio Booï

ORANJESTAD - Diasabra awo riba 29 di october, Masiduri ta presenta un bunita show cultural na homenahe na un di e baluartenan di nos cultura, Sr. Lio Booï. Cu presentacionnan di canto, musica y baile di diferente artistanan y gruponan local e evento folklorico ta sigur di bira uno hopi anima. Por spera e dushi zonido tipico di caha di orgel 'Nos Cultura' y tambe 'Mi Dulceta', canto di e primerisima Sharon Rose y solista Hilyann Croes y goza di e ritmo di tambu di 'Grupo Sodo y Cuero'. Tambe

por disfruta di e bunita piezanan di 'Trio Amor' y 'Tipico Ola Tropical'. Presentacionnan di grupo di baile 'Monarca', 'Flor di Trinitaria' y sin laga afo, Masiduri, ta completa e programa varia pa e anochi tan special aki.

Sr. Lio Booï lo ricibi un plakaat impresionante hunto cu su biografia. Sr. Lio Booï, baluarte grandi di Aruba, tawata un persona multi-facetico y a contribui inmensamente na e desarojo di nos cultura. Banda di ta un gran musico, contribuiendo na loke awe ta nos himno nacional, Aru-

ba Dushi Tera, Sr. Lio Booï tawata un pintor, actor, autor, poeta, declamado, orador y docente di Papiamentu y pintura. Den corto un persona multi-talentoso y ta pesey kier dun'e e balor mereci.

Pueblo di Aruba ta keda cordialmente invita pa bin disfruta diasabra awo, dia 29 di october, di un anochi folklorico na Cas di Cultura cuminsando di 7'or te cu 10'or di anochi. Un danki special ta bay na Departamento di Cultura Aruba, UNOCA y Venus Car Rental pa e aporte grandi duna encuanto e produccion. □